

Dumonda Hohl concernent l'unificaziun da las taxas d'utilisaziun d'implants da sport cun las vischnancas da staziunament

L'avrigl 2020 ha graubündenSport publictà la brochura «Utilisaziun optimala da hallas da sport en il Grischun». En quella vegni menziunà, che la finamira da la promoziun dal sport dal chantun Grischun saja quella da stgaffir in contum che promova il sport ed il moviment e nua che uschè bleras persunas sco pussaivel fan sport. Quai cumpiglia er l'utilisaziun optimala da l'infrastructura existenta da sport. La gronda part dals stabiliments da sport en il chantun Grischun, en spezial las hallas da sport, èn en possess da las vischnancas.

Cuira è in cas spezial. En il sector da las hallas da sport èn numnadamain – cun la citad da Cuira ed il chantun (cun l'implant da sport chantunal Sand) – tuts dus purschiders impurtants sin il martgà. Quai chaschuna inevitablamain ina situaziun da concorrenza en connex cun il sport d'unions.

Gia oz datti a Cuira differents reglaments d'utilisaziun e differentas taxas d'utilisaziun per las hallas da sport da la citad e dal chantun. L'attribuziun da las hallas chaschuna perquai savens malcontentientscha tranter las unions. En il rom da la realisaziun d'ina incumbensa ch'era vegnida iniziada da la AdC, da la PLD e da la pvl e ch'è vegnida acceptada dal cussegl communal, prevesa la citad da Cuira d'incassar naginas taxas d'utilisaziun pli en il sector dal sport da giuventetgna. Questa mesira vegn ad accentuar anc pli fitg las differenzas tranter la citad ed il chantun. Per las unions a Cuira vegn l'attraktivitad da l'implant da sport chantunal Sand a sa reducir dramaticamain. Quai pudess avoir consequenzas per l'occupaziun da la halla existenta.

Tenor la brochura da graubündenSport èn las hallas da sport ina reclama per vischnancas che promovon il sport ed il moviment. Plinavant mettan ellas a disposiziun a las abitantas ed als abitants spazi per sport e per moviment, renconuschan las numerusas acziuns prestadas en uffizi d'onur a favur dal sport, represchentan in'utilisaziun effizienta da las resursas publicas e gidan ad impedir novs edifizis betg necessariis.

Per pudair utilisar questas infrastructuras en moda optimala, èsi tenor graubündenSport da far atenziun, che las cundiziuns d'utilisaziun entaifer ina vischnanca ed en spezial las tariffas da locaziun en la medema vischnanca sajan unitaras per tut las hallas da sport. La situaziun a Cuira è qua in exempel, dentant probablamain betg il sulet cas d'applicaziun.

Or da l'optica da las sutsegnadras e dals sutsegnaders èsi impurtant – en il senn d'ina utilisaziun optimala da l'infrastructura da sport – da betg sa concurrenzar entaifer las vischnancas da staziunament. Plinavant èsi essenzial, che er il chantun s'adattia a las cundiziuns d'utilisaziun localas da las vischnancas respectivas.

Las sutsegnadras ed ils sutsegnaders tschentan perquai las suandantas dumondas a la Regenza:

1. È la Regenza pronta d'unifitgar las cundiziuns d'utilisaziun e las tariffas da locaziun a Cuira, sco che quai vegn propagà da graubündenSport?
2. Proceda la Regenza da medema maniera en autras vischnancas u è ella pronta da far quai en l'avegnir?
3. Tge custs supplementars stuess il chantun surpigliar, sch'i vegnissan fixadas – cun la citad da Cuira ed eventualmain anc cun ulteriuras vischnancas – mintgamai tariffas unitaras per vischnanca?

Cuira, ils 12 da favrer 2025

Hohl, Schneider, Degiacomi, Adank, Bavier, Berweger, Bischof, Brandenburger-Caderas, Caluori, Censi, Collenberg, Della Cà, Dietrich, Gartmann-Albin, Hartmann, Hermle, Hoch, Horrer, Jochum, Kappeler, Koch, Luzio, Rageth, Righetti, Schläpfer, Sigron, Stiffler, Tomaschett, Zindel (Igis)